

Prvo: Hajde neka smo i mi, hvala dragom Bogu, u nečemu prvi, pa makar to bio samo jedan dio ove naše BiH. Naime, nakon što nam je premijer Federacije BiH dao ostavku vjerovatno inficiran novim virusom (prelažem da ga umjesto nekom glupom alfanumerikom označimo tj. nazovemo Premijerus Zbrisijus Dioklecijanius) isti se nevjerovatnom brzinom proširio na susjednu nam Hrvatsku gdje je kancelar, pardon, Premijer Sanader - neočekivano podnio ostavku. Ako se širenje virusa nastavi, a sve su prilike da hoće, bojim se da će ovaj put MFF biti taj koji će u bliskoj nam budućnosti morati proglasiti pandemiju. A, bez obzira što je Balkancu drago kad komšiji crkne krava, na kraju ipak SVI plaćaju skuplje mlijeko...


Većina (naivnih rekla bih) iznenađena je i prvom, a pogotovu drugom ostavkom. Ova većina je podcijenila inteligenciju i političku intuiciju (neki bi rekli oportunističku) kako gospodina Brankovića, tako i (kancelara) Sanadera. Mislim, onako na osnovu ovo malo ženske intuicije, da njima dvojici koji, kako je znano, sebe doživljavaju poželjnim macho tipovima, jako teško pada kada nisu u ulozi zgodnih, sveznajućih i uspješnih. Njihova sujeta, naime, ne može podnijeti da ih neko "pegla" sitnicama poput enormnog vanjskog i unutrašnjeg duga koji je njihova politika porodila, naprimjer.

I onda je najbolje zbrisati - što bi rekao gospodin Sanader - ovo je napravio samo Car Dioklecijan i on. Ja ću ga patriotski dopuniti - i naš Branković....

Drugo: čini mi se da smo mi ovdje malo sabraniji (da ne upotrijebim neku jaču riječ) od komšija nam iz Hrvatske - mada i tamo ima zdravorazumskih primjeraka tj. onih koji se nisu rasplakali nad odlaskom vrljih nam premijera. I, naravno, pretjerivanje je ovdašnji manir, pa je jedan razočarani birač Sanadera na nekoj od hrvatskih televizijskih postaja nazvao tovarom (tovar na bosanko-srpsko-hrvatskom znači magarac - ko ne zna). Neukusno, rekli bi neki - totalno pogrešno, kažem ja. Naime, magarac je birvaktilski Golf diesel - malo troši, puno radi i nikada se ne kvari. A to vas nikako ne može asociirati na gore pomenuti dvojac - osim ako im niste mama...

A meni je moja svojevremeno ispričala lijepu (a kasnije sam shvatila i poučnu) priču koja otprilike ide ovako: Kad je svojevremeno Nasrudin - hodži uginuo magarac sav se komšiluk iskupio da ga tješi. On je toliko plakao da mu jedan komšija reče: "Hajde brate hodža smiri se, pa nisi toliko plakao ni kada ti je onomad žena umrla..."

"Nisam" - odgovori Nasrudin hodža kroz suze - "jer svi ste tada govorili - hajde hodža ne plači, oženit ćemo te opet. A sada niko ne govori - ne plači hodža kupit ćemo ti novog magarca..."

Dakle, dragi birači - ne plaćite - oženit će vas opet... 

Aida Delić
Glavna i odgovorna urednica